

FRITJOF CAPRA
The Tao of Physics
Shambala Publications, Berkeley (California), 1975

O vevi za sintût tabaiâ di chest libri e ancje in maniere positive, ma cuis-sà parcè, il so titul no mi ispirave masse e cussì o ai spietât un grum prime di leilu. Bon, o vevi tuart. Il mût cemût che Fritjof Capra, fisic des al-tis energiis, espert di sistemis, al presente la vision dal mont subnuclear al è decisementri sconcertant e al pues lassâ perplès e confusionâts. Chel che si pues dî di chest libri al è che a la fin, la vuestre vision dal mont no sarà plui la stesse. Si pues crodi o no, si pues sedi dacuardi o mancul, ma la analisi che Capra nus propon no nus lasse indiferents, e nus oblee a lâ in sot cun considerazions e meditazions in mert a la essence ultime dal créât. Plui di une volte si ciatin denant frasis fuartis che a lassin il segn, nol è di ducj i fisics scrivi robis tant che: “lis teoriis e i modei principâi de fisiche moderne a puartin a une vision dal mont intimementri co-rerente e in perfete armonie cu la concezion dal misticism orientâl”. Al è sorprendent il fat che a pensâle cussì a jerin ancje oms come Heisenberg, il pari de mecaniche cuantistiche, Bohr, Oppenheimer e altris fisics di prin plan. L'autôr al scomence cul scrivi: “la finalât di chest libri e je chê di esplorâ il rapuart fra i concets de fisiche moderne e lis ideis fonda-mentâls des tradizions filosofichis e religjosis dal extrem orient”. Sul im-prim e podarès someâ une *mission impossible* ma man a man che si va indenant cu la leture si rindisi cont dal contrari e si spalanchin gnûfs ori-zonts e gnûfs mûts di pensâ. Ma cemût puedino centrâ une cu la altre lis modernis teoriis des parteselis elementârs cu lis filosoftis dai Indùs, dai Budiscj e dai Taoiscj? Jentrant inte analisi dal mont ultramicroscopic si ciatin corispuidencis sorprendentis e, al dîs Capra, “dispès al è quasi impussibil stabilî se ciertis afermazions a son stadiis formuladis dai fisics o dai mistics orientâi”.

Par vêr, une vision dal gjenar e jere stade elaborade ancje dai filosofs grêcs de scuele di Milet, di Talete, Anassimandro e Eraclito; par lôr l'u-nivers al jere une robe vive e no esisteva distinzion fra materie, energije e creaturis viventis. Chescj filosofs a pensavin il mont come un “eterni di-

vignî” mentri che “la staticitât dal jessi e je pure ilusion”. A la unitât che e conten e e trassent dutis lis fuarcis contrariis al è stât dât il non di “*lo-gos*”. Dome in seguit cheste unitât e je stade separade, cu la introduzion di un Diu spirituâl che di adalt al controle e al proviôt dut, dividint cus-sì il spirt da la materie, un dualism tipic di dute la filosofie occidental che e je vignude dopo. Tal prin cjapitul Capra al presente il percors de filosofie occidental che e à puartât a la vision atuâl dal mont, guviernât da lis invariabilis e eternis. A cheste costruzion mecanistiche l'autôr al contrapon la vision organicistiche orientâl che e dîs che: “dutis lis robis e ducj i events percepits dai sens, a son peâts, colegâts fra di lôr e a son do-me differents aspiets o manifestazions de stesse realtât ultime”. Pal filo-sof orientâl cheste nestre tindince a sintîsi come unitât sengule e distinte e je une ilusion introdusude dal nestri mût di pensâ e e va superade. “Tant di plui o jentrin tal mont submicroscopic” al continue Capra “tant di plui si rindin cont che il fisic moderni, come il mistic orientâl, al rive a considerâ il mont come un insiemit di components inseparabii, integrajents e in continui moviment e l'om al è part integrant di chest siste-me”. Spes la sience e ven considerade responsabil di un grum di proble-mis de nestre societât, “Chest libri” al dîs Capra “si propon di miorâ la imagjin de sience mostrant che e esist une armonie sostanziâl fra il spirt de savietât orientâl e la sience occidental. O cîr di fâ capî che la fisiche moderne e va ben di là de tecnologjie, che la vie – il Tao – de fisiche e pues sedi une vie cuntun cûr, une vie davuelte ancje a la cognossince spi-rituâl e a la realizazion di se”.

Il volum al è organizât in 18 cjapitui, sierâts in trê sezions, plui un epi-lic finâl. Te prime sezion “La vie de fisiche” l'autôr al met a confront i doi mûts di pensâ che a son a la fonde, un de culture occidental e chel al-tri di chê orientâl, il mût razional e chel intuitif, indicât te filosofie orientâl cu la cubie dai archetips “Yang” e “Yin”. La complessitât dal mont di vuê e je costituide di “varietâts e complessitâts infinidis” al dîs Capra “un mont multidimensionâl che nol conten ni liniis dretis ni for-mis perfetementri regolârs, là che lis robis no vegnin mai in sucession, ma dutis tal stes moment, là che par fin il vueit al è curvât”. De lôr ban-de “i mistics orientâi a insistin continuementri sul fat che la realtât ulti-me no pues mai sedi ogjet di resonament e di cognossince dimostrabile. Ni e pues sedi descrite in mût adevuât cun lis peraulis parcè che e sta di

là dal c'jamp dai sens e dal intelekt che a produsin lis peraulis e i nestris concets”.

Capra al dediche po ampli spazi a la “gnove fisiche” nassude cuntune vere rivoluzion de fisiche classiche. Rivoluzion che e à provocât violentis reazions intal *establishment canonic* di fin votcent. Ancje nons famôs come il stes Einstein e Heisenberg a son stâts turbâts “[...] chesh moviment al à produsût la sensazion che e sarès stade taiade la base che si poiave la sience”. Te seconde sezion, dedicade a “La vie dal misticism orientâl”, l'autôr si ocupe di un mont estrani par noaltris occidentâi, presentant i fondaments filosofics e lis viodudis cosmogonichis dai induiscj, dai budiscj, dal pinsîr cinês, dal Taoism e dal Zen esplorant un grum di tescj sacris fin a plui di trente secui in daûr. Comun denominatôr di cheshis visions dal mont al reste il concet di unitât e di ecuilibri che i cinês a àn elaborât un sistem di archetips cosmics contignûts tai “I King” o Lîbris dai mudaments, opare che e pues sedi considerade il nucli centralâ dal pinsîr e de culture cinese, paragonabil ai Veda indians e a la nestre Biblie. La tierce sezion, dedicade a lis corispuindencis, si vierç cu la analisi dal procès di osservazion par spiegâ “cemût che e nas la mecaniche cuantistiche – la teorie dai fenomens atomics – la idee di interconession fondamentâl de nature. L'autôr al torne pui voltis sul concet che “i sistemi osservâts a son descrits inte mecaniche cuantistiche in tiermins di probabilitât” e che “no esist la sigurece di dulà che si cjate une partesele subatomiche intun dât moment e cemût che si davuelzará un procès atomic. Dut chel che si pues fâ” al spieghe Capra “e je une prevision di probabilitât”. Un grum stimolant al è il c'japitul 11 sui opuescj, concets che i orientâi a consideravin purementri astrats che, secont lôr, “a partegnin al mont dal pinsîr e duncje a son relatîfs”. Ma ancje la fisiche moderne e à superât chescj concets e Capra lu spieghe clarementri analizant il significât dal dualism ondis-parteselis che nus puarte a resonaments parelis a chei produsûts dai “mistics orientâi cuant che a cirin di interpretâ la lôr esperience di une realtât di là dai opuescj”. Te esposizion dal volum no podeve mancjâ la analisi dal spazi-timp cun ducj i siei paradòs, Capra i dediche il c'japitul 12. Il c'japitul 13 “L'univers dinamic” si vierç cu la frase “il fin primari dal misticism orientâl al è chel di rivâ a considerâ ducj i fenomens che si davuelzin tal mont come manifestazions differentis di une realtât ultime”. Il concet che al fâs di cancar achì al è

“cumò che la masse e je stade ricognossude tant che forme di energjie nol covente plui che e sedi sdrumabil, e pues trasformâsi in altris formis di energjie” e plui indenant “la creazion e la distruzion di parteselis materials e je une des consecuencis plui impressionantis da la ecuivalence fra la masse e l’energie: ven a stâi che lis parteselis no son plui consideradis come un *materiâl* fondamentâl, ma tant che pacuts di energjie... e a àn di sedi representadis come entitâts cuadridimensionâls dal spazi-timp”.

Plui indenant si lei ancjemò: “I budiscj a viodin ducj i ogjets tant che procès intun flus universâl e a dinein la esistence di cualsisedi sostance material”. Un dai temis centrâi de ricerche subnuclear e je la analisi dal vueit e l’autôr al dediche a chest passionant argoment dut il cjakpitul 14. “Il vueit al è concepît come une entitât dinamiche di impuantance fondamentâl”. Daspò Capra, al passe a analizâ il concet di cjump in dutis lis sôs formis: eletric, magnetic, eletromagnetic, gravitazional, ricuardant cemût che te teorie di Einstein “materie e cjump a son viodûts come parts inseparabilis e interdipendentis di un dut unic” – e ancjemò – “Il cjump cuantistic al è viodût come la entitât fisiche fondamentâl: un mieç continui presint par dut il spazi. Lis parteselis a son dome condensations locâls dal cjump, concentratzions di energjie che e va e che e ven e di consecuence a pierdin il lôr caratar individuâl e si disfantin tal cjump che lis conten”.

Tal cjakpitul daspò, il 15, “La danze cosmiche”, l’autôr al continue cun “Dut l’univers al è impegnât intun moviment e intune ativitat cence fin, intune incessante danze cosmiche”. Dopo a vegnin analizadis lis fameis di parteselis, Leptons e Adrons e lis cuatri fuardis fondamentâls. Cul juttori dai diagrams spazi-timp di Feynman, Capra nus spieghe cemût che si davuelzin i scambis fra partesele e partesele e la pussibilitât di creâ continuementri parteselis virtuâls. “I mistics orientâi a àn une vision dinamiche dal univiers, simile a chê de fisiche moderne” al scrif l’autôr “e nol sorprend che ancje lôr, a vedin doprât la imagjin de danze par spiegâle” e ancjemò “la danze di creazion e di distruzion e je ae fonde de esistence stesse de materie [...] lis parteselis virtuâls [...] ancje lôr a son creadis e sdrumadis a partî dal vueit [...] che duncje al partecipe ancje lui a la danze cosmiche, creant e distruzint cence fin configurazions di energjie”. Te mitologije Indù cheste danze cence fin e je rapresentade di

Shiva. Un altri aspiet impuantant, tocjât tal cjakitul 16 al è chel des simetriis. Par descrivi i Adrons e lis lôr interazions, Capra al presente, tal cjakitul 17, la teorie da la madrîs “S” proponude par Heisenberg tal 1943 che e pues sedi definide come “un insiemi di probabilitâts par dutis lis possibilis reazions dulà che a son coinvolts i Adrons”. “Cheste teorie” nus spieghe Capra “a descrif il mont des parteselis subatomicis come une rêt dinamiche di events”. Chi il parêl orientâl al è stupefacent e si pues ricognossi tes peraulis di S. Radhkrishan: “La vite no je une robe, e nancje il stât di une robe, ma un moviment e un mudament continuât”. Chi l'autôr al torne su “il libri dai mudaments” cinês, il famôs “I King” che al conten i simbui divinatoris clamâts esagrams e che, secont chel popul, a rapresentin dutis lis possibilis situazions cosmicis e umanis. Ogni simbul al è formât di doi opuescj, il “yang” e il “yin” che a si misclicin in continuazion creant e distruzint struturis e situazions intune eterne danze, propi come che al sucêt tes parteselis dal cjakamp cuantistic e chi, si pues dî, fisiche moderne e misticisim orientâl si dan la man. L'ultin cjakitul, il 18, al è dedicât a la “compenetrazion” e si vierç cun la declarazion “[...] la idee di *madons fondamentâi* de materie no je plui sostignibil”, in sostance Capra al rive a afermâ che “lis teoriis de fisiche atomiche e subatomiche a rindin simpri plui improbabile la esistence des parteselis elementârs [...] a sugerissin invezit che lis parteselis a son di considerâ plui procès che ogjets”. Cheste scuele di pinsîr e à dât il sburt par disvilupâ la teorie dal “bootstrap” (che e sarès la curdele par tirâsi sù i stivâi), proponude di Goffrey Chew e che e rappresente il definitif abandon da la concezion mecanicistiche de fisiche moderne. La teorie e dîs, fra l'altri, “[...] il mont nol pues sedi intindût come un assemblament mecanic di entitâts che no si puedin analizâ ulteriormentri [...] l'univers al à di sedi viodût come une rêt dinamiche di events intercolegâts”. Cheste teorie però e va ancjemò plui lontan fin a “dineâ la esistence dai constituents fondamentâi de materie, no acetate nancje entitâts fondamentâls, nissune leç, ecuazion o principi assolût e partant, e abandone ancjemò une volte une idee vecje di centenârs di agns, chê da lis costantis assoludis che a àn vût une funzion essenziâl tes sciencis naturâls. A chest proposit Capra al sosten che “te concezion moderne si riten che il rûl des *constantis fondamentâls* al sedi dome temporani e che al mostri i limits da lis teoriis atuâls”. Cussì, i fisics dal XXI secul si stan svicinant simpri di plui

a la vision orientâl dal mont. “Un univiers indivisibil” nus dîs Capra “dulà che dutis lis robis e ducj i events a son colegrâts, dificilmentri al varès un sens se nol ves une sô coherence interne”. Aromai a son un grum di sienziâts che a concuardin cul principi che “[...] ogni robe tal univiers e je colegrade cuntune altre robe e no esist nissune part che e sedi fondamentâl”, i mistics orientâi si son rindûts cont che “[...] spiegâ alc al vûl dî, in sostance, mostrâ in ce tiermins che un ogjet al è colegrât cun dutis chês altris robis. E stant che cheste operazion e je impussibil, lôr a sostegnin che nissun fenomen sengul al pues sedi spiegât”. Par tornâ a la fisiche moderne, Capra al scrif a rivuart de teorie dal bootstrap “[...] ogni partesele e je componude di dutis chês altris parteselis, dulà che componude al à di intindisi come coinvolziment une intune altre, tal sens dinamic e probabilistic”.

In fin l'autôr al è dacuardi cui mistics orientâi che a sostegnin che al è impussibil descrivi chescj fenomens cun lis peraulis e al conclût “Cuant che la cognossince contignude in cheste vision e sarà completade, no podarà sedi comunicade cu lis peraulis. E sarà la cognossince che al veve tal cjâf Lao-Tzu, plui di vincj secui indaûr quant che al scriveve: *Chel che al sa nol tabaie – Chel che al tabaie nol sa*”.

Pauli Corelli
Mandi Observatory, Pagnà¹
corelli@mail.conecta.it